

Regelmoatig presentere vieër os "Bie Wieze Van Sjpreëke", in de Trompetter. Vier nuëdige jieëdere oet om hie aan deel te numme. Doer 'n sjtukske te sjrieve en noa onge sjtond e-mail adres te sjikke, of om 'ns langs te komme op een van os oavende; de 2^e maandig van de maand om 20.00 oer Schoolstraat 4 in Broenssem.

Doeëdgeblood

Ich leës sjmurges de gezit
't Helle en sjlechte nuuts
De ieëlenj van de ganse welt
Ligkt neëve mien sjmauer
De ganse welt éé kruuts

Ich zit soaves de tv aa
De welt sjturmt mien kamer i
Mit oerverdovend behei
Zit ich der mitte i

En van de angere kantj
Is 't allemoal klatergood
Idols, McDonalds, verkezinge
De welt is egelik allang doeëdgeblood
Wiel Roeselers

Vreugjoar

't Vreugjoar is 't sjoëenste joargetie van de veer die in ing joar vuurkómme...ving ich.
Ich höb miene nuie fiets al oetgeprobeerd.
Lupt prima, vieftieën versjnellinge, twee remme op 't vuurrad, twee op 't hingerrad, airbag en remparasjuut.
De bóksj mit 't wesjleere krüts hoof neet mieë.
D'r zit noe 'n zaal óp dat bloar en aambeiveilig is.
Zieëlig...fietse in de vreugjoarslóch en genete van de veugel die fleutend zitte te vrieje in de beum.
In mien blómmegeëdje höb ich al ing sjup deep gegrave en inne emmer kouwmes gesjtruid.
Joamer dat 't vreugjoar 't kótste joargetie van 't joar is.
Zoeë kót das'te gee moment verlore mós loate goa.
Óp inne sjoëene vreugjoarsaovend, es ich vöal tied höb, leës ich geer ing sjun book.
Zoeë loos ich lets ing book van inne ziékere Aristoteles.
Ich dach ieësj dat dat de kieper van de F.C.Saloniki woar, mar dat bleek ing misversjand.
Aristoteles woar 'nne ouwe filosoof.
Deë zag das'te ónger 't sjpatzere 't allerbetste deep kins noadenke, dat is 't zelfde wie filosofere.
Onger 't sjravele in d'r gaad kins'te dus óch gans good filosofere.
Ich höb de pes aa sjpatzere en ich fiets dan óch vöal lever durch de bliuende Limburgsje velder en weie.
En wen'ste zoeë durch ós sjoëenste provinsie fietst, kin'ste soms zoeë deep noadinke das'te die bliuende döarehek neet zuus en dan mós'te mieëstal efkes óphoate mit filosofere.
Mar hei-oet bliekt waal dat d'r fiets 't mieëst filosofiese verveurmiddel is.
Doe zits dr'óp, doe berieds 'm, doe regels zelf 't tempo, en doe filosofeeësj.
De res kumt da vazelf, en óch de kónkluzie dat egelik nieks vazelf kumt en dat geluk soms hieël vöal muite kos.
Wen ich dan mien fiets in d'r sjtal höb gezat, lekker ónger de broes höb gesjtange, óp 't benksjke in mien geëdje zit en op verzeuk va mien vruike "Frühlingstimme" van d'r Johann Strauss oet miene moeëneka loat vluie, da weet ich dat geluk in 't vreugjoar get wieëniger muite kos.

Thei Janssen

Vuurjoarstied

Eindelijk is 't weer zoeë wiet,
't is weer vuurjoars tied.
't Sönneke sjient weer doeër de beum,
't graas wurd weer langzaam greun.
De blome beginne weer te gruije,
Sommige beginne zelfs te bluije.
De vuëgel vleege weer tsjilpend rondj,
Wat zunt die natuurlijke dinger toch gezondj.
't Is gewuën 'n lus vuur 't oog jieëder daag,
Gelukkig dat dat noch ummer maag.

Preuf 't vuurjoar zoeë lang wieë 't geet,
Doe zals zieën wie good dich dat deet.
Zoeë lang vier doa van noch kinne geneete,
Hove vier os zelf neet op te sjeete!

Dink dan ooch ins wat hubbe vier 't toch good,
En es 't nuëdig is put dan oeët dat vuurjoar hiël veuël nuje mood!
Ron Logister.

Geveul i bringen

De zurge van de welt
Die verhelpe dat geet neet
Ze zint dich veuël te groeët
Ooch al dont ze dich nog zon leed
Mer de zurg van alledaag
Van noaber broar of nich
Me deed al hieël veuël
Went me die verlich
't Geet neet vuur de prestasie
Vuur welt en noageslach
Mer vuur 't geveul wat-ste
In 't leëve has i gebrach
Wiel Roeselers

Koad

"Woar 't rokt,
is och hits";
zach Ulesjpiegel
en heë wermde zich
aa inne peëdskuttel.
Jan Halmans

Oppe kommoëd

Aan miene hote poeët
Hub ich der sjtalsjuëtél hange
En in plaatsj van derm
Hub ich rubber sjlange
Ich kan knikkere
mit mien glaze oog
En klappere mit 't gebit
Och dat kin ich ooch
Miene nuje bril
Moch ich van 't fonds hoale
Mer mien toupetje
Kos ich toch neet verhoale
Oane huërapparate
Hub ich nog noeëts good gehoeërd
En went ich noa bid goan
Ligkt de hilf van mich oppe kommoëd
Wiel Roeselers

Feeslift

Wie de ieësjte rumpele koame woar 't in paniek
't hat zien fees toen loate lifte in ing kosbare kliniek.
Heure man vóng dat fantastiesj
Heur gezich woar wer elastiesj
Nieks van rumpele en óch ging vouwe
juus zoeë glad es vuur 't trouwe
Bis dat heur vrundin zag "dat is toch gek"
"diene kop past nit mieë op diene nak"
Mar dat trók d'r dokter vlot weer glad
'n paar sjnitjes, angesj kries 'te doa wer inne zak.
Toch woar d'r plastiesje sjirurg nog neet tevreje
deë zag "je borste hange teveel naar beneje"
dat woeëd ópgevuld mit silikone
en noe lupt 't wer mit "oben ohne"
Thei Janssen

Zoeë mér inne daag

Wie flot inne daag toch vergeet,
Bedink ich mich jieëdere kieër went de zon onger geet!
Dan laot ich mien gedachte ins achterhoale,
Wat houw deë daag vuur 'n verhoale?

Deë daag deë vreug is begos,
Omdat 't noe eenmaal neet angesj kos!
Oetsjloape zoot d'r gewuën neet in,
Mér dat heët ooch wieëinig zin!

Rustig 'n bietje bie gekomme,
En doa noa 'n ontbijtje genomme!
Vervolges d'r agenda ins d'r bie gepak,
Om te kieke welke afsproake d'r vuur huj zunt gemak!

Precies zoeë wie ich 't mich houw gedach,
En ich houw mich d'r mér flot bie neergelag!
D'r agenda sjting weer volledig vol,
Kortom: inne nuuje wirkdag sjting op de rol!

Op weëg noa 't wirk gegange,
Mit mér één groeët verlange!
Went zoeë merkte ich al gauw,
D'r hiëmel woar sjtroalend blauw!

Woare die 8 oeër noe mér al vuurbie,
Dan houw ich weer lekker vrie!
Mér dat woar mich huuj neet gegeëve,
Tsja, zoeë geet dat in 't leëve!

Op 't wirk woar 't hieël erg druk,
Dat woar 'n geluk bij 'n ongeluk!
Want flotter dan ich houw gedach,
Woeërd doeër mien collega's "bis murge" gezag!

Inne hiële vrieje oavend in 't vuuroet zich,
Dat goof inne glimlach op mien gezich!
leësj rustig mit z'n alle get gegeëte,
En doe de leuke dinger van 't leëve neet vergeëte!

D'r woare deë oavond veuël sjoëën dinger,
Zoeë wieë 't gejoel van alle kinjer!
En dan de pracht en praal van de natuur,
Ooch in dizze tied nog ongeremd en puur!

Vanzelf minder leuke dinger woare d'r ooch get,
Mér doa hub ich effe neet teveuël bie opgelet!
Die wirke toch alleen mer op 't gemood,
En dus is doa-aan dinke gaar neet zoeë good!

De zon begos onger te goan,
En d'r daag hoeërt langzaam op te besjtoan!
Inne daag mit veuël gebuërde zake,
Die os herinneringe noeëts kwiet zulle rake!

Ron Logister

Wanjele

Van de dokter mot ich wanjele
Went ich bin veuël te zjwoar
Noe ligk in ene luije sjtool
Mit op jieëdere poeët 'n bloar
Wiel Roeselers

Doefes vol mit düfkes

Sjarel, ózze ouwe noaber,
houw 't doefes vol mit düfkes,
en in al zien vrieje sjtónde,

sjtóng heë op zieng doefes,
bei zieng vuëgel, op zieng sjlûfkes.

Heë leep doa dan get rónk te kieke,
onger d'r sjtub en onger de vere,
leep te fleute en te lokke,
en nui voor oet te probere.

Vriedigsoavends ginge al zien dere,
in ing kórfke dan op rees,
mit de allerbeste wunsje,
van d'r Sjarel en zieng Trees.

't Zóndigsmörges sjtóng d'r Sjarel,
gans vreug al op zieng oetkiekpos,
In Paris, Bordeaux en Barcelona
woeëde de doeve dan gelost.

't Trees leep waal ins te sjelle,
op deë vieze doevepoep,
dat die dere valle lete,
op heur wesj, en op de sjtoep.

"Ich wil," zag Sjarel teëge 't Trees,
"vuur gee good mieng doeve kwiet,
en al loate ze soms get valle,
aan deë poep...doe hób ich sjiet".

Thei Janssen

Der Mertplei

Op 't Lindeplei, onge rieje tente
Lope luuj mit veuël en wieëneg cente
Ze wete nog neet wat ze wille kope
Mer ze trampele, ze kieke en lope

Op 't Lindeplei graaie ze in der hoop
Onge-op likt volges hun de koop
't Geluk likt vuur 't griep
aan 't ungesjte wurdt ongeveulig gerieëte

Op 't Lindeplei kiekt der toeëre
Van 't oud roadhoes neer op boeteluuj en boeëre
Die vinge, der kieës en 't freut kins-te hie good kope
En de erm vrujkes en menkes, die lope en lope

Jan Halmans

Der koelman

Erm woare de luuj
Erm woar dit landj
Van zompe en beënje
Bare grondj en zandj

Nieks oppe dusj
Nieks woar 't weërd
Bis koale gevonge
Woeërde in os eërd

Wie angesj dit landj
Wie angesj os welt
Wie de koele koame
Brachte wirk en geld

Hel woar 't wirk
Nut en ooch zjwoar
't klaude dien krach
'n bietje joar noa joar

zjwart woar de koal
zjwart woar 't good
zjwart ooch der koelman
bis in longe en blood

in 't duuster van de nach
in sjteen en in sjtub
verrikde minnige koelman
in zjweet ziene ruk

De longe vol sjtub
Maag en derm bedorve
Aan 't wirk is minnig ee
Doezend doeëde gesjtorve

Angs vuur 't daak
Angs vuur 't gevoar
Vuur lief en gees
Onmiensjelijk zjwoar

't drieve 't jage
noeëts neet genug
't systeem woar
egelik bedrog

't ganse leëve
van weeg bis graaf
sjtumde de koele
vuur de luuj aaf
wirk en de hoezer
bonne vuur koale
loeën en aafreëkening
op de koel te hoale

hermenie en fanfaar
of de voetbalclub
de koel regelde al

es pries vuur de sjtub

Wieveuël zint der blieëve
Onge i gen eërd
Wie veuël bleëve uëver
Mer woare nieks mieë weërd

Wie veuële motte
Nog in zon bild
Huuje daags nog leëve
Omdat ´n leëve neet tilt

Beë vuur de koempels
Uch vuur gegange
Beë vuur de luuj
Die noe nog zin gevange

Geneet van de sjopping
Van blome in de wei
Veul de zonnestroale
Zieën de kluëre van de hei
Ruuk ´t huijend graas
Geneet van ´t leëve
Bedank ´s Levenhieër
En bedink dich dan eëve
Hie in dit landj
Of wiet uëver zieë
Zint ummer nog luuj
Die ´t leech neet kinne zieë
Wiel Roeselers

Leefde is

Leefde is,
haote van
en dinke aa
zörge vuur
vertroewe op
en same goa.
Thei Janssen

Wiesheed

Doe bis ieësj ene vreëme doer dien gedanke, en neet doer de kluër van dien vel.

Wiel Roeselers